

Jahresbericht Aktive plus

Mir hei äs abwächsligsriichs, spannends, luschtigs, schweisstribends u erfougriichs Turnerjohr 2023 hinger üs. Gstartet si mir u.a. mit es paar Aktivitäte im Schnee u im März si mir zerschte Mou ds Mürre im Träningswuchänd xi – zäme mit de Aktive vom TV Stude.

Im zwöite Qurartau hei mir tatchräftig am Spiudag für d'Seeländer Jugend mitghuufe. Äs isch äs arbeitsriichs, aber ou äs fägigs Wucheänd bi herrlechem Wätter xi. U de het sech de ou scho aues ums Turnfescht dräit. Mir Aktive plus si am Seeländische Turnfescht ds Pieterle wider gmeinsam mit dä Manne vom TV Stude aträte u hei dr 3. Platz erreicht. Härzlechi Gratulation! Ds Abschlussbrätlet mit öich isch wie immer uh gmüetlech, luschtig u ä schöne Ustusch ungerenang xi.

Ds dritte Quartau isch immer vouer Überraschige. Mir hei ir Summerhitz äs „Turne“ ar u ir Aare gnosse, hei ä Schnupperkurs bim Seeclub Bieu dörfe bsueche, si mitem Velo zum Apéro nach Pieterle, hei dr Wäg gfunge im Maisfäudlabyrinth ufem Frienisbärg, hei dr Vita-Parcours turnet und natürlech ds aujährlèche Boccia-Turnier mit dr Männerrige düre gfuehrt.

Und last but not least hei mir ä cooli Nummere fürs Soirée dörfe lehre, wo üs aune viu Spass het gmacht.

Dr Bsuech ufem Wiehnachtsmärit mit Glühwy und dr Wiehnachtshöck mit de Aktive u Froue im Wydepark hei das viufütige Jahresprogramm abgrundet.

Mir danke härzlech au dene, wo ä Turnstung organisiert, a üsne Aläss gschaffet, a de Wettkämpf grichtet, bachet u g'aperölet hei u ou dene, wo eifach si mit drbi xi. Dä Dank gäbe mir ou gärn a die angere Riege, Häuferinne u Leiterinne, so wie a Vorstand. Nur die Verbindig aui zäme macht dr DTV Stude us.

Ufenes xungs, spassigs u erlääbnisriichs 2024

Für ds Leiterteam - Kerstin